

出曜經

才五

四百廿
宮五

50953



元禧九年丙子二月日重脩

皇圖永固 帝階級昌

佛日增輝 轉輪常轉

山城州天安寺法舍利院置



出曜經卷第五

姚秦三藏竺佛念譯



宮

放逸品下

說法雖微少

一意專聽受

此名護法人

除去姪怒癡

衆結永盡者

故名爲沙門

說法雖微少者少而有要義味相應昔有二

比丘在深山中學一人多聞一人寡淺時少

聞者持戒完具所誦經文唯有一句日日誦

誦更不求受時虛空神及山林神日日稱善

願樂欲聞道人所說時彼多聞比丘以已所

知衆妙之義甚深經句高聲諷誦山林諸神

默然不對亦不唱善時多聞比丘尋懷恚怒

語彼山神。今此晚學比丘所學淺薄。唯誦一
句。天便稱善。善哉。我今多聞義理甚深。采拾衆
經言詞妙語。與汝誦習。然諸天神亦不應對
亦不稱善。天神報曰。比丘不自責。方復責我。
此少聞比丘言與行相應。汝今比丘雖誦三
藏行與經違。佛所演出。曜亦有此偈。

說法雖微少

一意專聽受

此名護法人

除去姪怒癡

此比丘與法相應。雖未盡姪怒癡。方便令盡。
汝雖多聞。晝夜習姪怒癡。貪著色聲香味。細
滑法。此少聞比丘。晝夜禪思。念不分散。是故
恒與稱善。汝雖多聞。意不專一。是故不稱善。

時彼比丘聞諸天語即懷慚愧自恥所作山
神猶尚見我穢行况神通得道而不觀見耶
我今自改思惟妙智不復興念著姪怒癡如
其所行言行相應諸天日日稱善無量天人
履行隨朋友諫於善法得具足成就爾時比
丘執行精勤得世俗妙法不淨安般念四意
止暖法頂法忍法世間第一法以次得證須
陀洹果斯陀含果阿那含果阿羅漢果比丘
得道已報謝諸天遭蒙勸諫拔濯清淵我今
得道盡蒙神祇之力多所饒益多所成就復
重與諸天說法心開意解得法眼淨是故說
曰說法雖微少

不放而得稱
緣淨得生天

放逸致毀謗

不逸摩竭人

過去久遠無數世時有佛出世名曰迦葉至
真等正覺在世教化所度有緣衆生已訖於
無餘泥洹界而般泥洹爾時衆生四部之衆
耶旬舍利起七寶塔興敬供養復經數世塔
遂凋壞無補治者是時議合邑衆九萬二千
人時鉢沙王最爲上首鉢沙王告諸大衆汝
等各自勸勵共造福德佛世難遇人身難得
雖得爲人或墮邊地生邪見家我等何爲貪
著世俗歡樂不如開意修治朽故塔寺諸人
靡不皆從受王教令即共修治朽故塔寺復

共發願我等諸人心齊意同共治此寺設有
毫釐福德者不墮三塗八難之中便生天上
人中同處不異復聞將來有佛出現名釋迦
文彼初說法使我大衆最初得度以王爲首
是時九萬二千等人隨其世壽各各命終盡
生天上處忉利天宮復經數世閻浮利內有
佛出世名釋迦文至真等正覺十号具足三
十二相八十種好紫磨金色圓光七尺語聲
八種如羯毗鳥音是時九萬二千天受天福
已各各命終生摩竭國界鉚沙王年長八歲
繼嗣王後以法治世無有阿曲修治正法恩
慈下及不害生命分檀布施周窮濟厄遠行

經過暫停息者盡供給之是時儒童菩薩捨
八萬采女捐王重位夜非人時捨國求道自
剃頭髮復脫寶衣所乘白馬盡付車匿還國
白王生死苦惱憂勞無數子今學道要求果
證若成所願當還度王是時菩薩轉復前進
道逢獵師著其法服狀如沙門菩薩問獵者
所著法服名爲何等獵師報曰此名袈裟被
著遊獵群鹿見已謂爲學道之人皆來敬附
各無恐懼我等以次取殺用自活命菩薩聞
此倍興慈悲

夫人依四等

拔濟衆生類

袈裟如來服

除穢而造穢

我今有此著身天衣極細軟好可共博賀獵
師報曰王子生長深宮身體軟細不更寒苦
恐壞王子身菩薩報曰但賀無苦此是古聖
賢人標幟獵師報曰王子寶衣價直無數今
此袈裟無所任施何爲苟欲博賀菩薩報曰
意欲所須不計貴賤獵師報曰此衣垢穢膿
血臭處不敢博賀菩薩報曰臭之與香開意
見與自當浣濯獵師即脫衣賀菩薩寶衣是
時菩薩著法衣手執藕華葉入羅閱城乞食爾
時數千萬衆普集一處遙見菩薩舉手讚歎
或言善來或言日月或有叉手自歸命者或
相問訊爲是天耶梵耶釋提桓因耶衆人所

圍不容乞求尋執華葉還至城外徑至東山
人衆追逐前後相次時餅沙王在高樓上遙
見人衆追逐菩薩即問左右此諸人衆皆奔
趣山爲有何故有一大臣審識菩薩即白王
曰此是釋種子辭家出學遊蕩在外或能謀
曷國事當往誅殺餅沙聞已告彼臣曰護卿
種族勿吐此言正使釋子紹王位者作轉輪
聖王我等便爲臣佐若使出家學道自致佛
者我等願爲上首弟子最初說法先在其例
是時餅沙王車載飲食種種甘饌往就山中
與菩薩相見尋前禮足自稱姓字摩竭國界
餅沙王者我身是也菩薩報曰我先識矣何

須致敬餅沙王啓曰今獻微貢供食之餘願
見納受以示微心菩薩默然受食食訖行清
淨水王前白言若使王子成無上道者當見
先度永離世苦時餅沙王禮足取別菩薩進
路到阿蘭所阿蘭諸弟子等遙見菩薩來即
白其師今有一人端正殊特徑趣師門必求
爲弟子也時阿蘭即告弟子而說此頌
吾觀遠來士 衆相無缺漏 此必王世界
終不宗奉師

是時菩薩問阿蘭曰汝學積久涉苦無數爲
獲何證而自娛樂阿蘭報曰吾所遊學度於
色想上至空處於其中間而自娛樂是時菩

薩便作是念阿蘭無智獨吾有智阿蘭無信
獨吾有信阿蘭猶尚得此空定況我進學不
成無上等正覺乎是時菩薩思惟色想反覆
校計即獲空定即問阿蘭汝所獲定齊是空
耶復出空乎阿蘭曰菩薩所學定意齊是而
已更無餘定可狎習者是時菩薩內自思惟
吾今宜可至鬱頭藍弗所即至藍弗所問藍
弗曰汝今在此學來積久爲獲何定而自娛
樂藍弗報曰吾所遊學從不用處至有想無
想處菩薩聞已即自入定便獲不用處至有
想無想處是時菩薩便作是念藍弗無智獨
吾有智藍弗無信獨吾有信藍弗猶尚能獲

此定況我進學不成無上正等覺乎菩薩捨
此定已不由此法得成無上等正覺內自思
惟說此偈曰

衆生貪自喪

樂獲世俗定

輪轉墮生死

禍災入世冥

是時菩薩復自思惟此非至要泥洹之道我

當更求出要之路復向藍弗說此偈曰

我當暴屍骸

露現鈎鏢骨

要當方便求

生老病死本

是時菩薩便復前進在閑靜處勤形苦體日

進一麻一米六年苦行意欲起行起則前倒

坐則却偃是時兜術諸天下降衛侍菩薩觀

見菩薩無出入息或言命終或言滅度悲哀
感結而說斯頌

本執弘誓心

極世無邊境

捨彼忉利宮

今方取命終

爾時有天前問菩薩若使尊人戡患人間飲
食精氣當以天上自然精氣益菩薩力是時
菩薩復作是念若我今日受天上精氣斷人
間食者則非其宜是時菩薩便不受諸天所
貢飲食精氣菩薩勤苦苦行已經六年便自
校計身中我今氣力羸劣夫成無上等正覺道
不以苦行勞身然後成道我今宜可服食人間之
食食秬米蜜麩膏油塗身是時菩薩便說此偈

煎熬濕愛本

以心智斷別

心爲萬想本

計身無有仇

爾時菩薩即如所念人奉蜜麩乳糜膏油塗
身時菩薩左右有梵志二女供給所須時彼
二女穀五百牛乳飲二百五十牛復穀二百
五十牛乳飲百二十五牛復穀百二十五牛
飲六十牛穀六十牛飲三十復穀三十飲十
五穀十五飲七復穀七便爲菩薩作食乳沸
出釜上一仞復還入釜時有相師梵志見釜
乳沸還相謂言若有立根得力食此乳糜者
便成無上等正覺道時二女人以金盃盛糜
貢上菩薩菩薩納受食已澡漱以金器投于

水中釋提桓因接取持詣天上菩薩氣力充
體渡尼連禪水是時水側有一人名曰吉祥
執劔刈草菩薩直前語吉祥曰見與少草敷
地結加趺坐吉祥奉上草往詣樹下躬自敷
草結加趺坐發大弘誓我今已坐此樹下終
不壞坐要成無上等正覺道乃起于坐是時
弊魔將十八億衆并魔子薩陀至菩薩所或
獸頭人身或一頭兩體或爲猿猴師子虎兕
毒蛇惡獸魔鬼形體若干擔山吐火手執刀
劔戈矛戰盾側塞虛空跳踔喚吼來恐菩薩
菩薩慈力一毛不動便成無上等正覺道魔
即退還是時如來熟視道樹目未曾瞬時有

三賈客遠涉道來欲還本土諸天固遮不使
時過牛車頓躓諸天告曰如來成道已經七
日可往奉獻飲食即以器盛蜜酪酥往至如
來所貢上飲食是時如來不欲納受所以然
者若我舒手取食者與外道梵志不別我今
當觀過去諸佛世尊爲用何食適作是念諸
天空中曰過去諸佛皆用鉢食發語已訖四
天王奉上四鉢非是工巧所造自然成就是
時如來復作是念今四天王奉上四鉢若我
取一捨三取三捨一則非其宜今盡取四鉢
按爲一鉢時彼賈人以蜜酥酪奉上如來即
爲呪願今所布施欲使食者得充氣力當令

施家世世受福安快無病終保年壽終受吉祥兩足安隱四足安隱遠來安隱現在安隱夜安隱晝安隱日中安隱一切諸穀子安隱居家盡安隱無病安隱及諸一切眷屬安隱多諸淨潔飲食活百秋見百秋爾時世尊七七四十九日寂然不說法內自思惟欲使前人自來請受時摩竭人民聞菩薩已成佛道晝夜懇惻追念如來摩竭國界疫氣縱橫應度衆生八萬人死盡生天上爾時世尊漸復前進先降五次二五次三十七次十三村人爾時閻浮利地有六十羅漢如來六十一爾時世尊告諸比丘汝等人間分衛兩兩為伴慎

勿獨行所以然者衆生處世或有利根或有
鈍根不遇沙門者便失泥洹爾時世尊轉詣
鬱毗黎梵志村聚爾時世尊降千梵志轉向
羅閱城餅沙王聞如來轉詣羅閱城人間分
衛即嚴四種兵欲出城外諸天閉城門不使
王出王問左右何故不出城虛空報曰大王
當知有緣衆生幽繫在獄若王放大赦者乃
得見如來耳爾時大王尋放大赦牢獄繫囚
悉得開解是時王尋得出城往迎世尊如來
遙見餅沙即下道詣尼拘留樹下坐時餅沙
王即下步進往趣如來頭面禮足三自稱字
姓名我是摩竭國界餅沙王也世尊告曰我

先已知是摩竭王耳爾時世尊命主復坐漸
與說法使摩竭人民萬二千人諸天八萬諸
塵垢盡法眼得生是故說曰不逸摩竭人緣
淨得生天

不欲致名譽
智者所承受

智者分別義

無逸義豐饒

不欲致名譽者為諸賢聖正見之人復為諸
佛賢聖弟子所見歎譽如此之人能去放逸
習清淨行不放逸之人於諸善法增益功德
多所饒益夫人處世從今世至後世與善法
相遇遭賢遇聖聞法輒得蒙度皆由不放逸
得此名譽在在處處紹繼佛種正法久存是

故說曰不欲致名譽智者分別義者廣學之
人亦知俗義復知道義云何知俗義或習耕
田種作或入海採寶或學書文詞或筭計曆
數或學刻印封藏或爲王者執使通致遠近
或和合二寂各處無爲如此俗義皆由不放
逸得辦此事云何智者解了道義坐禪誦經
佐助衆事云何坐禪夫坐禪入定者得須陀
洹果斯陀含果阿那含果阿羅漢果得初禪
二禪三禪四禪空處識處不用處有想無想
處復得四等慈悲喜護神足天耳知他人心
智自識宿命復見衆生逝者生者不憍慢之
人入禪定意辦此諸法成第一義斯由不放

逸也放逸之人終不成辦是謂坐禪之人所
獲功德云何誦經堪任誦習契經律阿毗曇
雜藏及外異學所誦經典有人稟受不恪其
義若有外學來詰問者便能訓答無有狐疑
不放逸人能習此法放逸人者不能成辦云
何佐助衆事是時無放逸人能勸四輩供事
三寶興起塔寺或起講堂冬溫夏涼或作食
堂修治補缺散華燒香香汁灑地供給當來
過去現在衆僧不放逸之人能成辦此事放
逸人者不能成辦是故說曰智者分別義無
逸義豐饒者不放逸人饒財多寶於世伎術
無所乏短意欲施行出衆人表採置真珠磲

礫馬瑙琥珀水精琉璃無價摩尼珠此是俗
間不放逸所得出家學道得阿羅漢獲第一
妙智見致身證得空入空三昧得無願入無
願三昧得無相入無相三昧得此泥洹要路
者皆由不放逸也是故說曰無逸義豐饒也
智者所承受者所以言智者言無漏失語常
含笑不懷憍慢便能興致如此之德無智之
人不能成辦是故說曰智者所承受也
現在所存義亦及後世緣勇士能演說
是謂明智士

現在所存義者不放逸人於現在法中多獲財
寶自然受福爲人所念言從語用承受其教放

逸人則無是也是故說曰現在所存義也亦及後世緣者不放逸人得爲人次便能布施持戒守齋見諸行道者代其歡喜以諸善法香熏身體於百千世顏貌端正是故說曰亦及後世緣也勇士能演說者隨時應適不失其所所謂勇士者佛及弟子是也是故說曰勇士能演說也是謂明智士者能成就衆法分別思惟爲人將導示人之善除人之惡是故說曰是謂明智士也比丘謹慎樂放逸多憂愆能免深海難如象拔汗泥

昔佛在舍衛國祇樹給孤獨園爾時國王波斯匿有一暴象恒入軍陣所在征伐無不降

伏然彼暴象飲酒過多沒在深泥將諸大象
人衆數千共挽此象不能移動有一智人見
而問曰汝等衆人何等作爲衆人報曰王家
大象暴戰沒在深泥以數千象力及以人衆
共挽不能移動智人問曰此象先時力爲多
少衆人報曰此象戰鬪力無崖限智人復告
衆人汝等還捨象衆吾能拔出使得無他是
時智人即集鼓角椎鍾鳴鼓像如戰鬪復使
衆人皆著器仗象聞鼓聲謂爲外寇入境共
相攻伐即從深泥起奔趣軍衆馳奔四面求
索鬪戰時波斯匿王問左右拔象深泥是誰
之力左右白王有一遠僑智人設此權謀得

免象難王尋賞用以爲輔佐時有衆多比丘
眼見耳聞便自校計象爲六畜無有慧明墮
無間處聞戰鬪聲便從深泥而自拔濟然我
衆人沒在生死之海不離五道之難有生老
病死毒畏之患不能自拔共相追逐一身滅
壞復受一身動與罪連還轉六趣求出無期是
時諸比丘日夜精勤不暇食息如救火然如
避劫燒熾然諸法焚燒結使如鐵百鍊成器
必利人亦如是結去心存豁然大悟得阿羅
漢果六通清徹存亡自由爾時世尊以天眼
觀清淨無瑕穢知諸比丘執志堅固信不懷
倦各相克勵復知戰象自拔深泥爲後衆生

作大炬明亦使正法久存於世闡揚大教遠
近聽聞在諸大衆而說此偈

比丘謹慎樂放逸多憂愆能免深海難

如象拔淤泥

比丘謹慎樂者持行比丘心不放逸內外清
徹無有瑕垢遊志無爲無染無汙是故說曰
比丘謹慎樂放逸多憂愆者衆畏之源首多
諸愆各亡國破家無不由之猶火猶賊亦如
毒藥放逸之人心意倒錯墮入惡趣自入深
淵復教人入淵多諸恐懼初無歡樂之心是
故說曰放逸多憂愆也能免深海難者云何
名爲深海難餓鬼畜生地獄是故從三趣求

毫釐善而不可得能自拔濟者得須陀洹果
能拔餓鬼畜生之難以離世患不與罪俱是
故說曰能免深海難也如象拔淤泥者是時
戰象內心自念吾前後來受王寵待甘美飲
食吾先服食與王鬪戰無不降伏設我今日
沒在淤泥不自拔出與王進鬪者則我失由
來之名亦使一國被其毀辱是故說曰如象
拔淤泥
比丘謹慎樂
放逸多憂愆
散灑諸惡法
如風飄落葉

昔佛在摩竭國界甘黎園石室窟中是時衆
多比丘在彼衆中日夜行道樹木繁茂蔭厚

晝闇各不相見賊寢縱逸在彼暴虐恐怖諸
行道比丘及至秋節風飄葉落各得相見賊
自隱藏時諸比丘復作是念蔭厚葉茂寢賊
縱逸外事如是內亦當爾髮毛爪齒形容殊
妙覆諸結使姦愛遊蕩得伺其便劫善本財
貨衆多比丘到時持鉢入城乞食還詣精舍
自敷坐具端意正心係念在前思惟方便伐
結使賊漸漸除垢斷欲愛色愛無色愛爾時
世尊以天眼觀清淨無瑕穢見諸比丘共相
篤勵懇惻其心各在閑靜思惟校計各除欲
愛色愛無色愛爾時世尊欲使大法久存於
世爲後衆生作大炬明闡揚大教遠近聽聞

在諸大衆而說斯偈

比丘謹慎樂

放逸多憂愆

散灑諸惡法

如風飄落葉

結使大聚智慧火然斯不由師自然覺悟後
學衆生能法此者學中之上從師承受學不
進者學中下也如是比丘當求上學勿爲下

學

比丘謹慎樂

放逸多憂愆

結使所纏裹

爲火燒已盡

昔佛在摩竭國界甘梨園石室窟中是時衆
多比丘日夜行道地生衆草極大茂盛各不
相見賊竅縱逸在彼暴虐恐怖諸行道比丘

及至秋節風飄葉落各得相見賊自隱藏時
諸比丘復作是念蔭厚草茂竅賊縱逸外事
猶然況復於內髮毛爪齒形容端正殊妙覆
諸結使姦愛遊蕩得伺其便劫善本財貨衆
多比丘至時持鉢入城乞食還詣精舍自敷
坐具端意正心係念在前思惟方便伐結使
賊漸漸除垢斷欲愛色愛無色愛爾時世尊
以天眼觀清淨無瑕穢見諸比丘共相篤勵
懇惻其心各在閑靜思惟校計各除欲愛色
愛無色愛爾時世尊欲使大法久存於世爲
後衆生作大炬明闡揚大教遠近聽聞在諸
大衆而說斯偈

比丘謹慎樂
為火燒已盡

放逸多憂愆

結使所纏裹

猶如野火燒盡茂草永滅無餘此亦如是除
欲界結使亦無遺餘

比丘謹慎樂

放逸多憂愆

各各以次第

得盡諸結使

昔佛在摩竭國界甘黎園石室窟中是時衆
多比丘日夜行道到時入城分衛道逢王者
收估取利送詣王藏諸比丘見已內自思惟
王者教令民悉靡從況今如來有無盡之藏
何者是邪所謂四意止四意斷四神足五根
五力七覺意八真行有此諸道之法得盡結

使爲良爲美無過上者是故說甲各各以次第得盡諸結使

比丘謹慎樂

放逸多憂愆

義解分別句

行息永安寧

昔佛在摩竭國界甘黎園石室窟中是時衆多比丘到時著衣持鉢入羅閱祇城乞食見諸王子及長者子數十之衆共學射御箒箒相拄無空漏者時諸比丘見已便作是念此諸貴族子學此射術者希望稱譽兼俟外寇令敵不入國雖學是術不成學術能以毫釐四諦分別思惟係在心者乃爲學術衆多比丘乞食訖還出城到精舍澡洗手脚敷尼師

檀結加趺坐係念在前盡夜不息使獲四諦
爾時世尊以天眼觀清淨無瑕穢見諸比丘
共相篤勵懇惻其心各在閑靜思惟校計各
除欲愛色愛無色愛爾時世尊欲使大法久
存於世爲後衆生作大炬明闡揚大教遠近
聽聞在諸大衆而說斯偈

比丘謹慎樂

放逸多憂愆

義解分別句

行息永安寧

比丘謹慎樂

放逸多憂愆

變諍小致大

積惡入火焚

昔佛在舍衛國祇樹給孤獨園時佛弟子名
拘提於羅漢果六返退還至第七頭自覺得
證即求利劍復恐退還自言其命是時弊魔

波旬馳奔四面求覓比丘神爲生何處不知
神所生之處往至問佛奔趣四方求覓神識
不能知處求覓拘提亦不知處世尊告曰拘
提比丘已取滅度神識處空與空合體擊魔
聞已心興鬱毒舉身自投青蓮香浴池中池
水涌沸水性龜鼉之屬盡皆命終是時拘提
比丘求於道果七返退轉諸羅漢等見其退
轉復恐却退晝夜精勤修賢聖道而現在前
爾時世尊以天眼觀清淨無瑕穢見諸得道
比丘各自精勤於證恐退還復欲使大法久
存於世爲後衆生作大炬明在大衆中而說
此偈

比丘謹慎樂 放逸多憂愆 變諍小致大
積惡入火焚

恚怒隆盛 冷水揚沸 惡至罪牽 受報無窮
晝夜當精勤 牢持於禁戒 爲善友所敬
惡友所不念

晝夜當精勤者何以故說精勤遠離非法之
相貌去離不善法精勤於善法精勤滅有漏
邪見顛倒狐疑猶豫皆悉除盡復求方便去
諸習結是故說曰晝夜當精勤牢持於禁戒
者身口意威儀善念修習心如金剛不可沮
壞執戒牢固不爲外取得其便禁戒者二百
五十戒牢持守護不爲慢怠防戒當如不度

棄捐法姪怒癡起息令不起是故說曰牢持
於禁戒爲善友所敬惡友所不念者善友者
正見之人修於真正之法等成就者盡爲彼
人所敬念要無放逸是故說曰爲善友所敬
也惡友者惡知識離彼此岸見諸善人修道
德者心懷嫉妬不欲聞見是故說曰惡友所
不念

無念及放逸

亦不習所修

睡眠不求寤

是謂入深淵

無念及放逸者多喜忘誤性意錯亂心所施
爲盡爲不善善念遂滅惡念增生已生惡念
便墮惡趣爲人所憎嫉放逸之人晝夜思念

吾當捨此至彼或生害心起若干念是故說
日無念及放逸無念及所修者意常慢惰已
生慢惰爲道俗所棄云何爲俗所棄如佛契
經說長者子慢惰之人有六非義受罪之法
云何爲六事應速行而不行事應晚行而不
行飽食應作而不作極飢應作而不作極熱
應作而不作極寒應作而不作是謂長者子
慢惰之人有此之六非義受罪之法不得至無
上正真之道是謂俗所棄云何爲道所棄於
是比丘不誦契經律阿毗曇及以雜藏不坐
禪誦經佐助衆事於現法中不至究竟不肯
修習於道俗中永無所習云何於俗無所修

習意不汲汲修習命財非命財所謂命財者
象馬牛羊奴僮僕使是謂命財云何非命財
金銀七寶穀食田業養生之具是謂非命財
藏置不牢爲賊所侵是謂俗所不修習云何
於道所不修習不守護諸根前念生後念續
念念惡隨不容善想如河於山而下流有人
意欲中斷絕而不流者終不可得放逸之人
亦復如是念念惡隨有人欲於前念後念中
間生善心者終不可得所以然者以其惡念
念念相隨是故說曰亦不習所修也睡眠不
求寤者猶如有人或時在衆聽法爲睡眠所
逼不能覺寤或時與人言語輒便睡眠唯有

智者方宜諫諭或以苦言諫諭或以罵詈加
彼或以方便先瞋後喜是故世尊出五鼎沸
世爲人演說生死熾然之法設能分別知苦
源本則無復此衆患之法不求巧便於諸善
法日衰日耗增有漏行是故說曰睡眠不求
寤是謂入深淵者戒有二業云何爲二一者
二百五十戒清淨如真金二者於諸善法不
廣修學求盡有漏得無漏證亦復不求向須
陀洹得須陀洹果向斯陀舍得斯陀舍果向
阿那含得阿那含果向阿羅漢得阿羅漢果
於斯諸法不肯狎習便自墮於深淵不至究
竟是謂道者入深淵也云何俗入淵若人處

俗不習乘象御馬執鈎擲索相鬪險僞應進
應退盡不修習便自沉沒不能顯其名德家
業不成就就是故說曰是謂入深淵也

當求除前愆 使不失其念 隨時不興慢

使習於善法 善法善安寐 今世亦後世

當求除前愆者 猶如曾入海人 諳知入海孔

穴 道路所經過處 某處某求漿 某處博戲家

某處姪種家 如此諸家當念 遠離設至海中

有果名摩檀那 亦莫取食 設食此果者 便不

能采致珍寶 彼執律者 亦復如是 示人徑路

當念避去非法之聚 設入非法聚者 則不能

採致深法 猶如有人 素不明道 意欲所趣 則

有留礙亡失財物能按大道不從邪徑者便
安隱歸家內法亦復如是守護善法使外惡
不入常念思惟不去心懷是故說曰當求除
前愆使不失其念云何隨時不興慢者常念
隨時不興於嫉慢恒有勇猛心不懷懈怠去
離放逸諸法並集衆善具足猶如勇士能却
外難著鎧持仗心不怯弱手執弓矢脚不移
轉便不復畏外敵比丘亦復如是執心牢固
興弘誓意而自纏絡除結使賊亦無疑難是
故說曰隨時不興慢也云何快習於善法所
謂法者善不善無記世尊說曰念除不善無
記當修於善法何以故不善法者令人入惡

無記法者令人墮愚惑之中善法者令人生
善處天上人中或入無爲泥洹境界是故說
曰使習於善法云何善法善安寐者不復畏
墮地獄餓鬼畜生若不毀辱不懷畏懼卧寐
恬淡寤則常安是故說曰善法善安寐今世
亦後世若在今世無有愁憂苦惱何以故爾
以其修善法故若生後世遭遇賢聖不離善
處斯由身身相續習善所致是故說曰今世
亦後世也

思惟不放逸 爲仁學仁跡 從是無所憂
當念自減意

思惟不放逸者去五縛著不住五處終日思

惟導引比丘修持禁戒戒有二業云何爲二
業一者二百五十戒二者柔順戒業出言柔
輒不傷害人受諸梵行人教誨之法所聞法
教聞能遵奉不失賢聖出要之路是故說曰
思惟不放逸也爲仁學仁跡從是無所憂者
定意不亂內懷慈仁加被衆生不習欲愛瞋
恚愚癡但念思惟去離出愛求入寂定之室
是故說曰爲仁學仁跡從是無所憂云何當
念自滅意常當專念守意不亂莫求彼短僥
望其行已得正定外邪不入弊魔波旬不得
其便或變其被服作父母兄弟來入詭嬈善
男子者不能得其便心已得定終不忘失無

漏善法已得善法便受如來名号已受名号
佛法便得久存是故說曰當念自滅意
善求出要 順從佛法 當滅死衆 象出華室
善求出要者疾求方便善求伴侶厭患生死
貪欲遠離復求思惟惡露之觀雖處生死心
不染著於生死出要者出生死也亦出三有
更不受生出要者所謂出家學道修無上道
離於家業出要者露精自暴不求覆蓋是故
說曰善求出要也順從佛法者云何順從佛
法守一正見不著邪部與行相應不缺道心
行相應者何者是謂得阿羅漢不缺道心何
者是謂除諸結諸不善法無邪倒見違此法

者則不與佛法相應是故說曰順從佛法也
當滅死衆者云何名爲死衆百八結是也求
方便滅使不生復重說曰云何爲死衆所謂
生老病是亦求方便滅使不生豎弘誓幢擊
四等鼓召受化人去生老病死懸解脫幡布
大音聲遍滿世界普告蚘飛蠕動之類吾今
已成等正覺道生死已盡梵行已立所作已
辦更不受有如實知之汝等亦當如我盡生
死源入無畏城無復衆惱涉歷生死是故說
曰當滅死衆也象出華室昔有人捕得大象
繫以鐵鎖屬王波斯匿象甚兇暴傷害人民
不可稱計或還害象破壞市肆生拔果樹不

可禁止波斯匿王即遣人衆圍捕縛束閉在
華室繫絆不與食猶暴難禁制是時王家更
被暴象皆著器仗有征伐夫戰象法有所攻
伐必同聲喚時彼繫象聞知有外寇來侵境
者象懷瞋恚頓鎖自擲踏壞華室馳走東西
命敵而行衆人見已皆懷恐怖爾時世尊以
天眼觀清淨無瑕穢見此暴象被繫得脫自
命大敵欲摧滅之自求永安如來將欲現其
勇猛爲後衆生現其大明亦使正法久存於
世在大衆中而說斯偈

善求出要順從佛法當滅死衆象出華室
爾時世尊告諸比丘龍象出現必有所益準

爲畜獸宿識極深生八難處離於仁義聞衆
多象被甲著仗欲攻外寇奉教齊喚象王聞
者頓繫馳奔恐不免難畜獸愚闇猶尚乃爾
況汝等比丘躬從如來聞句義味義句身味
身不能斷縛著結使遠離生死自繫牢獄復
告四部衆夫世間繫者無有牢固爲危爲脆
爲摩滅法不能捨家斷茲慕心去俗因緣自
不念道復不教人自行其道象之被繫未經
旬日便自求脫得處無爲汝等衆生染著生
死追憶受身積如十方山岳目覩死者淚如
十方四海人之遺髮計如十方生草猶尚不
能得免衆難猶如重罪之人一歲三移出獄

復入獄不自改愆求出無爲何爲貪著放逸
不求解脫邪處在家業多諸穢汙養妻畜子
家之重絆念求方術捨茲著心時諸人民僉
然心悟心開意解求出爲道我等以斷世俗
羈絆復當方宜斷生死羈絆用意精勤晝夜
不停各各以次得須陀洹果斯陀舍果阿那
舍果阿羅漢果是時如來見諸比丘各獲道
跡歎說善哉夫爲族姓子行應真正所以族
姓子剃除鬚髮被三法衣出家學道修無上
梵行生死已盡梵行已立所作已辦更不受
有如實知之受人信施不唐其功堪能爲人
福田不但我今讚歎汝身諸得道者皆讚歎

之亦能自利復能利人展轉相利則佛種不
斷正法亦久存於世若有衆生以其衣被飲
食牀卧具病瘦醫藥時惠施者獲福無量不
可稱計

若於此正法
越渡彼此岸

不懷放逸意

斷生老病死

若於此正法者內所修學皆謂正法不懷放
逸縱情自用更不涉胎受若干生雖復受生
生於中國盡其苦源是故我說苦之源本是
故說曰

若於此正法

不懷放逸意

斷生老病死

越苦渡彼岸

出曜經卷第五
官

完具官上 擢音濁 靡苗無也 錫毗上 謁反亦

好声 賀反莫候 標必 憺反 濯下音濁 煎熬反吾高 仇求音 藕華此云

偶上音 徑至反上 狎胡甲反 煎熬反吾高 仇求音

雛反 乳糜下 穀反古候 釜鼎音也 澡漱二早瘦 兕丑音 兕條

野反青色也 戈矛反密 下莫侯反 看反時也 尹跳 蹕下音 教條

瞬詩閏反 親昌難 穀外苦 角反 鈍徒困 詰起 活一

涯音吾加反 推鍾上直 僑音橋 暇音反 詰起

聞揚上昌反 龜元二音 弓矢反式 盲音 箸孤 僥音

詭下上 嬌過反 蛟飛上兄 蠕動軟音 絆半音

蹋亦徒答反 脆易破也 僉反七廉 羈非居此用也

五皆反 亦徒答反 踏反 脆易破也 僉反七廉 羈非居此用也

屋 五皆反 亦徒答反 踏反 脆易破也 僉反七廉 羈非居此用也

